













LES  
NOUVELLES  
DE L'AUTRE MONDE,  
apportees en poste des  
Champs Elisees.

Par le bon Genie de la France.

12

*Cette Satyre sans reprendre  
Les Conseillers des Potentats  
Est telle qu'on y peut apprendre  
A bien gouverner des Estats.*

Case

F

39

.326

1626n2

THE NEW YORK  
LIBRARY





L E S

NOUVELLES  
DE L'AVTRE MONDE.

**L**E ne ſçay bonnement ſi ce fut en ſonge, en effect, ou par vn rauiffement d'eſprit, que ie me trouuay dernièrement dans les champs Eliſees ; tant y a que i'y vy, que i'y entendy, & que i'y appris les ſecrets que ie viens vous déclarer icy.

Charon auoit des-ja paſſé l'Aduocat Seruin dans le ſejour des ames bien heureuſes, & les gardes que le Roy Henry IV. tenoit au paſſage de l'autre monde ne faiſoient que de le

A ij

presenter à sa Maiesté, de sorte qu'il  
 me fût aisé de recognoistre à la face  
 riantte du Roy, le contentement qu'il  
 receuoit dereuoir, apres vne si longue  
 absence, vn de ses meilleurs & plus  
 anciens seruiteurs; le bon homme de  
 son costé ne ressentoit pas vn moin-  
 dre plaisir en soy-mesme de iouyr de  
 la presence d'un Prince qu'il auoit ser-  
 uy tousiours avec tant de zele & de fi-  
 delité. Si bien que versant de ioye vn  
 deluge de pleurs, ô mon Roy, luy di-  
 soit-il, ie sçay que vous desirez sça-  
 uoir des nouuelles de vostre chere  
 France (car vous en auez tousiours au-  
 tant de soin que si vous la gouuer-  
 niez encore) le vous diray doncques  
 toutes les choses de la mesme façon  
 qu'elles se passent: Vous sçauiez, SIRE,  
 que ie n'ignore pas les affaires, &  
 qu'estant loigneux du bien de l'E-

stat plus que du mien propre, il ne s'est passé iamais rien dans le Royau-  
me dont ie ne me fois voulu esclair-  
cir, pour voir si ie pourrois y rendre  
quelque seruice au Roy vostre fils.  
D'ailleurs ie me suis tant estudié tou-  
te ma vie à l'ainour de la iustice & de  
la verité, que pour rien du monde ie  
ne voudrois vous alleguer icy chose  
qui repugnast tant soit peu à l'une  
ou à l'autre. Sçachez donc, SIRE, que  
i'estois comme las de viure lors que  
ie quittay la France, où ie voyois à re-  
gret la prosperité de ces hypocrites  
que chacun recognoist pour les au-  
teurs de vostre mort déplorable,  
toutefois ie n'en voulu pas déloger  
que ie ne rendisse auparauant à ma  
patrie les deuoirs ausquels la naissan-  
ce m'auoit obligé, & que ie ne luy  
donnasse les dernieres preuues de l'af-

fection que i'ay pour elle, ie choisi doncques le iour le plus propre à cet effect que i'eusse peu souhaitter, lors que le Roy vostre fils (desireux de refrener la fureur insupportable de sa Noblesse ahertee par vne pernicieuse coutume à s'entrecouper la gerge) voulut presider luy-mesme dans son Parlement, pour tesmoigner à cette assemblée solennelle le ferme dessein qu'il auoit pris de ne pardonner en façon du monde à pas vn de ceux qui au mépris de ses Edicts & de son authorité seroient tant insolens que de retomber en la mesme faute. Là, SIRE, ie fis vne harangue aussi libre que mon humeur, mais l'ardeur dont ie la proferois m'échauffa tellement que ma chaleur irritée ne trouuant point de nourriture assez forte dans mes veines seichees de vieillesse pour se ra-



fraischir, me fit trouuer aux yeux du Roy, de son Conseil, & de tout le Parlement, vne aussi glorieuse fin que ie me l'estois souhaittee. La dessus Motin las de l'écouter, sans prendre garde qu'il parloit au Roy, l'interrompit par ces quatre vers.

*Vous auiez vostre terme atteint,  
Vous estiez sec comme vne tuile,  
Lors qu'une lampe n'a plus d'huile,  
Son lumignon demeure esteint.*

Il n'y eust personne dans la compagnie qui se peut empescher de rire, tant de la boutade du Poëte, que de la raillerie de son quatrain, mais le Roy trauaillé de pensees bien plus importantes, apres auoir imposé silence & commandé que Motin fut mis en cage pour apprendre à parler plus à propos vne autre fois, continuez, dit-il, continuez Monsieur Ser-

uin & me dites en quel estat estoient les affaires de la Valtoline, du Piémont, du Palatinat, quel ordre donnoit le Conseil du Roy mon fils à la pacification des troubles du Royaume. Pour les troubles du Royaume, repart le bon homme, ils s'en alloient assoupis lors que ie dis Adieu à la France, le Roy vostre fils donnoit la paix aux Huguenots, & ie croy que rien n'en pouuoit empescher la conclusion, si d'auanture les Iesuites par leurs artifices n'y ont apporté des obstacles: car reserué ces broüillons & leurs supposts, il n'y a personne qui ne souhaitte avec passion le repos de l'Estat.

Pour les affaires de la Valteline, du Palatinat & du Piémont, ie croy que elles ne s'auancent gueres, parce que la ligue dont on veut faire chef le  
 Roy

Roy vostre fils n'est pas encore concluë, & que le sainct Pere traueille tant qu'il peut à la paix vniuerselle de toute la Chrestienté. A la paix, va dire le Roy secouiant la teste deux ou trois fois, vêtre sainct gris cela ne me plaist pas, vne bonne guerre vaut tousiours mieux qu'une paix fourree, & ie ne croy pas que l'on en puisse iamais faire avec les Espagnols. Pour la guerre, repart Seruin, vous sçauiez, SIRE, que ie n'y suis guere entendu, parce que ie suis homme de plume, mais s'il plaist à vostre Majesté d'en demander quelque chose à Monsieur de Praslin que voila, il vous en pourra dire plus de particularitez que non pas moy, parce qu'il est homme d'épée. Le Mareschal s'excusant, SIRE, dit-il, ie suis party de France premier que luy, & si ie ne me souciois gueres

de nouvelles, estant si fort affligé des faux blâmes que l'on m'imputoit que i'en suis mort de regret, quoy que le Roy vostre fils receust mes excuses, que la Royne sa mere ne voulust rien croire des crimes qu'on me mettoit sus, & que le Conseil recognust tres-bien que c'estoit des charitez que l'on me prestoit, mes actions passées ont tousiours esté si pures & si nettes que les cerueaux bien rassis n'ont iamais douté de ma fidelité, mais quoy les araignees s'attachent d'ordinaire aux plus belles fleurs, & ie ne suis pas le seul qui de mon temps me suis veu noircy de pareilles calomnies. Quels faux bruits n'a-t'on pas fait courir de Monsieur le Connestable touchant l'affaire de Genes? & du Marquis de Cœuvre touchant le fort de Riua? ma consolation est que la verité se trou-



ue tousiours plus forte que le men-  
songe , mais à fin que vous n'ayez  
point sujet de vous plaindre de moy,  
ie vous diray des affaires le sentiment  
que i'en ay. Les Espagnols, comme  
ceux qui recognoissent tres-bien l'a-  
uantage que les François peuuent a-  
uoir sur eux par les armes, feront tout  
ce qui leur sera possible pour auoir la  
paix, qui ne leur peut estre que gran-  
dement auantageuse, veu les mauuais  
termes où ils s'en vont reduits si la  
guerre s'éschauffe vne fois contr'eux,  
toutefois le Conseil est aujourd'huy  
composé de si bonnes testes que mal-  
aisément se laissera-t'il surprendre,  
Monsieur le Cardinal de Richelieu  
est trop soigneux du bien du Royau-  
me, del'honneur du Roy vostre fils,  
& de sa propre reputation pour ache-  
uer mal vne affaire si bien commen-

cee; i'en ay ouy dire tout plein de bien  
 aux bons François; interrompit le  
 Roy, les Cabalistes seuls s'en plaignēt  
 étrangement, c'est vne marque de sa  
 prud'hommeie acheua le sieur Descu-  
 res, parce que les traistres qu'ils sont  
 ne trouuent iamais personne à leur  
 fantaisie s'il n'est de leur bande. Il faut  
 auoüer, aiouta le Mareschal de Bouil-  
 lon, que c'est vn tres-habile homme,  
 toutefois ie trouue vn peu trop de  
 lenteur en ses desseins; il est vray, vint  
 à dire le President de Tou: Car, *prius-*  
*quam incipias consulto & vbi consulue-*  
*ris mature facto opus est.* Alors le Car-  
 dinal du Perron prenant la parole dit  
 qu'il n'y en auoit point de plus em-  
 peschez dans le Nauire que ceux qui  
 en tenoient le gouuernail. Mais Si-  
 gongne impatient d'en dire son auis  
 se haussant sur ses ergots pour estre

mieux apperceu vint prononcer ce  
quatrain tout haut par dessus leurs es-  
paules,

*Je sçay d'un Demon familier,  
Qu'il y a tousiours guerre oblique  
Entre l'vtilité publique  
Et l'interest particulier.*

Il n'y en eust guere qui prissent en  
bonne part ceste liberté, le Marechal  
d'Ancre, le Connestable de Luine, le  
Chancelier de Syllery, & le Garde des  
Sceaux du Vair tous d'un accord de-  
clarerēt qu'il en falloit faire punitiō,  
& monsieur de Bouillon qui auoit  
ajusté son auis sur celuy des autres, re-  
queroit que monsieur Seruin don-  
nast ses conclusions là dessus, lors que  
le Marquis de la Varenne vint auertir  
le Roy de l'arriuee du pere Cotton;  
le Conseil fut troublé de cette nou-  
uelle inopinnee, & craignant qu'il ne

vint inquieter le repos des champs E-  
lyfées ou semer quelque diuision par-  
my les esprits bien-heureux, deputa  
Seruin & Des-Cures pour l'empescher  
de passer outre, dont le pauvre Sigon-  
gne fut le plus content du monde,  
comme celuy qui s'attendoit d'auoir  
la teste bien lauee; ce qui fut cause que  
se voyant eschappé du peril qu'il ve-  
noit de courir, il composa ce Sonnet  
sur sa deliurance:

## AVX IESVITES.

*Bastarde engeance des Espagnes.  
Le vous rens graces des bien-faits  
Que ie reçois de vos forfaits.  
Dans ces tenebreuses campagnes.*

*Que le Roy las des maux souffers,  
Chasse quant & vous de la terre  
La peste, la faim, & la guerre,  
Pour l'enuoyer dans nos Enfers.*



*Venez maudites sauterelles  
De vos detestables querelles  
Perdre l'Empire de Pluton;*

*Quoy que vous faciez ne m'importe,  
Si chacune de vous m'apporte  
Autant d'heur que Pere Cotton.*

Mais Seruin & Des-Cures pour s'a-  
quitter de leur charge furent recevoir  
le Prouincial, de qui le passager Cha-  
ron faisoit d'estranges plaintes, tou-  
chant la peine qu'il auoit eüe à le pas-  
ser, & le danger qu'auoit couru sa na-  
celle d'estre enfondrée dans les bour-  
bis de l'Acheron; ce qui fit inconti-  
nent coniecturer à Des-Cures qu'il e-  
stoit chargé de quelques pacquets  
d'importance: on fit donc comman-  
dement à ceux qui l'amenoient de le  
foüiller, mais iamaïs on n'eust trouué  
sur luy ce qu'on y cherchoit, si vn  
quidam de la troupe ne se fust auisé

de luy regarder sous la langue où se  
rencontrerent toutes ses dépescches,  
qui portoient le desir ardent qu'a-  
uoient les Reuerends Peres de la com-  
pagnie de Iesus esendus sur la face de  
la terre, d'entretenir vne correspon-  
dance avec ceux du mesme ordre, ra-  
massez dans les champs Elysees, à fin  
d'auiser tous ensemble s'il se pourroit  
trouuer quelque moyen de radoubier  
en France les affaires de la Societé qui  
s'y en alloient fort descousuës. Au bas  
desdites lettres se lisoit en chiffres Es-  
pagnols, *Que la drogue du Catholi-*  
*con estoit tout à fait éuentee, & que si*  
*l'on n'en inuentoit vne nouuelle, la*  
*Caballe couroit risque de perdre tou-*  
*tes ses intelligences. Quoy veu & con-*  
*sideré Seruin luy demande qui auoit*  
*peu mouuoir vn esprit broüillon*  
*comme le sien à venir troubler la*  
tran-

tranquilité des bien-heureux, à quoy  
 père Cotton fit respóce qu'il ne pou-  
 uoit moins faire que d'aller où le de-  
 stin le conduisoit, & qu'ayant esté  
 chassé du monde par la surprise d'une  
 mort subite, il auoit appris des nou-  
 uelles toutes fraisches qu'il venoit a-  
 porter au Roy. On l'amena donques  
 à S. M. laquelle apprit de luy pour  
 tout potage, que la paix estoit arre-  
 stee entre le Roy son fils & le Roy  
 d'Espagne touchant la Valteline, à la  
 charge que chacun des deux Roys re-  
 mettroit entre les mains des Grisons  
 les places tenuës de part & d'autre. On  
 l'interrogea fort sur l'occasion de sa  
 mort si precipitee, mais on ne sceut  
 iamais rien tirer de luy, iusqu'à tant  
 que Berthelot, qui sans faire semblant  
 de rien l'auoit considéré depuis les  
 pieds iusqu'à la teste, auisa son Epi-

taphe que Theophile luy auoit attachée au dos en passant de Calais à Douure, ce qui luy fit dire assez haut à toute l'assistée, vous perdez temps, Messieurs, d'interroger ce matois, qui trouuera mille échapatoires sur chacune des demandes que vous luy ferez; le trouue plus à propos de lire l'Epitaphe que voila couché par écrit au derriere de sa robe, parce que s'il est bien faict vous y verrez les causes & les circonstances de sa mort; tout le monde presta l'oreille à ce discours, qui fut cause que l'écriteau pris par Des-Cures fut leu tout haut par le Cardinal du Perron.

## LE POETE.

*Cotton n'a peu trouuer d'auis plus salutaire*

*Pour se développer des vœux du Parlement*



*Que de finir ses iours d'une mort volontaire*

*De crainte de mourir plus criminellement.*

### LE PASSANT.

*Toy Demon qui iadis lisois dans sa nature*

*S'il estoit plus ou moins timide que trompeur,*

*De grace conte moy sa cruelle auanture  
Et me dis s'il est mort de finesse ou de peur.*

### LE DEMON.

*Passant ie ne scaurois contenter ton enuie,*

*Rongé que ie me sens du soucy qui te mord;*

*Il ne mit que la France en trouble par sa vie,*

*Mais il met tout le monde en peine par sa mort.*

*Chacun se douta bien incontinent  
qu'il y auoit du mal entendu aux af-*

faïres de la Societé, mais Berthelot pour acheuer la raillerie ajousta sur la mort du Pere Cotton ce couplet-cy aux precedens.

*en quelque lieu du monde où nostre  
gazette aille,  
Je veux luy faire dire en maniere d'ébat,  
Que le Pere Cotton craignoit tant la ba-  
raille,  
Qu'il ayma mieux mourir que de rendre  
combat,*

La conclusion fut que l'on donna des gardes au Pere Cotton de peur que par quelque remuë mefnage, il ne fist cesser la bonne intelligence de l'autre monde, & le Roy desirieux de remettre l'Estat du Roy son fils en son ancienne splendeur, fit assembler le Conseil pour auiser aux affaires les plus necessaires. Le Marechal d'Ancre & le Connestable de Luyne quoy

qu'en perpetuelle conteste s'y presenterent des premiers, mais le Roy les fit jetter sur le champ hors du Conseil, parce que ces potirós qui auoient mis toute la France sans dessus dessous en vne nuict qu'on les auoit veu croistre, estoient bastans d'en faire de mesme aux champs Elisees s'ils estoient vne fois admis aux affaires. Tous les vieux seruiteurs de Henry le Grand y furent receus à bras ouuerts, lesquels apres vne longue consultation donnerent en fin leur auis l'un apres l'autre, chacun selon son iugement. Le President de Thou demanda qu'on reformaist la Iustice & quel'on fist punition exemplaire des voleries des Financiers. Le Chancelier de Sylbery & le sieur de Villeroy parlerent pour la Paix: Seruin fut d'auis qu'on déchargeast le peuple d'une partie des

Tailles & qu'on fist vuider le Royau-  
 me aux Iesuites. Des-Cures remon-  
 tra de quelle ingratitude ils auoient  
 vsé vers luy, apres que par sa faueur ils  
 s'estoient veus establis dans Orleans  
 malgré tous les habitans : mais du  
 Vair entreprit leur defence & prote-  
 sta de leur fidelité, suiuy du Marquis  
 de la Varenne qui contrariant fort &  
 ferme aux conclusions de Seruin, se  
 vanta de les auoir si bien affermis dās  
 l'Estat qu'ils ruyneroient plustost la  
 France de fond en comble que de s'en  
 laisser chasser aussi hontéusement que  
 du temps de la Piramide. Monsieur  
 du Maine asscura qu'encore que les  
 Huguenots l'eussent tué deuāt Mon-  
 tauban puis que c'estoit le bien de l'E-  
 stat de les laisser en paix, il leur par-  
 donnoit sa mort de bon cœur, & don-  
 noit sa voix à la guerre étrangere. Le



President Ianin confessa qu'il n'y auoit personne si propre au gouuernement des Finances que le Duc de Sully, & que si on ne luy rendoit la Surintendance les coffres ne feroient iamais pleins. Le Marechal d'Aumôt iurât vn Mes-Dieu, maintint haut & clair qu'il falloit declarer guerre ouverte à l'Espagnol tant par mer que par terre, & se saisir des Pays bas par droit de bien seance, comme le Roy Catholique auoit fait de la Nauarre. Le Comte de Soissons soustint l'indépendance de la Couronne, & le Cardinal du Perron les Priuileges de l'Eglise Galicate. La Nouë, bras de fer, se plaignit de ce que les plus importantes charges se vendoient au plus offrant & dernier encherisseur, de ce qu'on méprisoit l'ancienne Noblesse, & de ce qu'on ne punissoit pas les duels

rigoureusement. Monsieur de Boüillon remonstra qu'il ne falloit pas laisser cõlumer l'armee du Roy de Danemark, ny abandonner les alliez de ceste Couronne, & quel'on ne deuoit rien entreprendre contre l'Espagnol que le Roy de Boëme son neueu ne fust rétably dans le Palatinat, & remis en possession de la dignité de premier Electeur. En fin tous ces auis ayans esté lóg temps debatus de part & d'autre, le Roy arresta (la paix mise arriere) que l'on ne donneroit secours aux alliez, que la Ligue seroit conclüë & signee, & que sans s'arrester à la reformation de la Iustice des Finances, & des Tailles, parce que les affaires étrangères pressoiët trop, on jetteroit vers la fin du Printéps vne armee de vingt & cinq ou trente mil-hommes sur l'Allemagne. Quel'on mettroit ordre  
aussi

aussi de cōseruer les droits de la Couronne & de l'Eglise Gallicane : Que pour les duels on feroit du mieux qu'il seroit possible pour en estouffer la eoustume. On alloit dépescher vn Courrier pour porter en diligence cet auis à Louys le Iuste, lors que le Cardinal du Perron tout échauffé vint remonstrer qu'il estoit besoin de faire vn Patriarche en France comme autrefois à Constantinople, & que c'estoit vne honte de souffrir que pas vn des Cardinaux François ne fust admis au sainct Siege: Pour toute responce on luy dit qu'il s'estoit auisé trop tard. Le Marechal de Biron plein de fougue maugreant de ce qu'on ne declaroit pas la guerre à l'Espagnol, forcenait contre son destin qui ne luy permettoit pas de retourner au monde pour se vanger de l'affront que ce

demy-More luy auoit fait receuoir.  
 Le Duc de Bouillô s'efforçoit de l'ap-  
 païser luy faïfant toucher au doigt que  
 les affaires defendoient de pareilles  
 entreprises. Mais le bon-homme Ser-  
 uin haussant sa voix toute cassée de  
 vieillesse & s'adressant au Roy, SIRE,  
 dit-il, quand ie me deurois sacrifier  
 encore vne fois pour le Public à force  
 de haranguer, si ne sçauois-je souffrir  
 que ceste canaille Hypocrite & Caba-  
 liste qui a tant donné de tours de reins  
 à la France, & qui vous a fait assassiner  
 malheureusement, demeure impunie  
 des crimes execrables qu'elle a com-  
 mis à la honte & ignominie perpe-  
 tuelle de nostre nation, ordonnez  
 donc, SIRE, qu'à tout le moins on  
 les bannisse, si d'auanture vous ne  
 voulez en prendre la vengeance tou-  
 te entière. Le Roy meu de ses raisons



(quoy qu'il eust oublié par vn excez de clemence les iniures passees ) fit ajouter aux articles du bien de l'Estat, Que si les Iesuites continuoyēt à faire les mouuais garçons on eust à les traiter à la Venitienne. Le Pere Cotton, ces parolles ouyes, tempestant contre sa coustume & demandant audience, protesta qu'on faisoit tort à ceux de son ordre de les mener de la sorte, & le Marquis de la Varenne intercedoit des-ja pour luy, requerant qu'il fust ouy en ses defenses, quand le Roy tout en colere luy fist cette réponse: Cōtentez-vous la Varenne du mal que vous avez fait à la Frâce & à moy tout le premier, par le rétablissement de ceste vipere dans mon Royaume, & ne venez plus m'aprocher des oreilles, ce Cottō empoisonneur dis-je, empoisonné, si vous ne voulez encou-

rir mon indignation & receuoir mes-  
me chastiment que luy. Alors pour-  
suiuant la pointe de son iuste cour-  
roux, il commanda que l'on chassast  
sur le champ toute ceste racaille es-  
croüellee du seiour des ames mieux  
fauorisées, n'estant pas raisonnable  
que l'Esprit de Diuision qui depuis  
cent ans ou enuiron n'auoit fait autre  
choses que troubler la Chrestienté,  
iouyst du bon-heur de la tranquillité.  
Le Conseil approuua la volonté du  
Roy, & donna charge à Haute-fon-  
taine, & à Des-cures de l'executer,  
qui firét tous leurs efforts des'en bien  
aquiter. Tout le monde s'en resioüis-  
soit dans le Paradis sousterrain, & ne  
restitoit, pour rédre ceste iouye accom-  
plie, que d'en faire la terre partici-  
pante. La difficulté fut de trouuer vn  
Courrier pour porter à la France tant

de bonnes nouvelles : car bien que  
MaistreGuillaume s'offrist d'executer  
promptement ceste charge, on la iu-  
gea trop pesante pour les espaules.  
Regnier demanda ceste commission,  
mais on le trouua trop Satyrique. Ra-  
pin comme bon François se ressouue-  
nant de son ancien Catholicon , s'en  
estoit chargé, mais sa destinee l'em-  
pescha d'effectuer son entreprise.  
Moy qui de bonne fortune auois esté  
là conduit par le bon Genie de la  
France , & qui ne demandois pas  
mieux que de reuoir la douce clarté,  
fis en sorte que l'on me donna ce mes-  
sage à faire. Le Roy me voulut voir  
auant mon partement, & me dit de sa  
propre bouche ces douces parolles.  
Ne máque pas mon enfât, de publier  
dans la France les secrets que tu viens  
de voir, d'oüir, & d'apprendre, & fay

ſçauoir au Roy mon Fils, de quelle façon i'ay traitté les ennemis domestiques de son Estat icy bas, à fin qu'il leur en face de mesme. Je luy rendis graces de l'honneur qu'il me faisoit de me iuger digne d'un Ambassade tant important, & luy promis de m'en acquiter avec autant de diligence que de fidelité. Je pris doncques le chemin de m'en retourner sous la conduite du bon Genie de l'Estat qui m'auoit amené dans ces demeures bié fortunées, Mais le Marquis de la Varrenne feignant de me reconduire, me coniura tres-affectueusement de dire de sa part aux Peres Iesuites, Qu'ils prissent garde à ne pas irriter le Roy contre eux, & que sans se mesler plus long temps des affaires qui passoient leur portee, ils se contentassent de viure riches & paisibles dans le meilleur



& le plus doux pays de l'Europe. Que c'estoit à eux d'y penser desormais à bon escient, puis qu'à faute de ce faire ils se deuoient asseurer d'estre perdus. Je luy donnay parole de leur porter cét aduis, ce que ie me mis en deuoir de faire dès que ie fus de retour au Monde. Voicy les effets de toutes les promesses que ie fis aux champs Elysees, si le publiq y trouue du contentement, cela m'obligera de faire encore mieux à l'aduenir. Adieu.

*Pour bannir la Seuerité  
De ceste maniere d'escrire,  
L'assaisonne la verité  
De mots & de contes pour rire.*

Handwritten text in a cursive script, likely a historical document or letter. The text is written in dark ink on aged, yellowed paper. The script is dense and fills most of the page, with some lines appearing slightly faded or obscured by the texture of the paper. The text is arranged in approximately 20 lines, with some variations in line length and spacing. The overall appearance is that of a well-preserved but aged manuscript.













